

Dithero tsa Tirelano mo Kutlwanong

51/2015 Thero ka Sontaga wa 19 morago ga moletlo wa Borarobongwe, e le ka 11. 10. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, le kwadilwe mo go Jer. 17:14, le re: **"Mphodise, MORENA, foo ke tla fola!Mpholose,foo ke tla phologa!"**

1. Sefela sa 13 - 13/14

2. Thapelo: Rara wa rona yo o mo legodimong, Modimo o o Boitshepo, re bona bopelotlhomogi le bopelontle jwa gago jo o re direlang ka jona, rona ba re leng baleofi, o re rometse Morwao gore a re golole mo thateng ya boleo, le mo thateng ya ga Satane, le mo thateng ya loso lo lo sa khutleng, re lebogela boitshwarelo jwa maleo jo re bo abelwang ka ntlha ya Mopholosi wa rona yo e leng Jesu Keresete, re a kopa gore o re bolokele mo tumelong ya nnete gore re nne re dumele mo go Jesu Keresete, Mogolodi wa rona, re tshabele mo go ene ka metlha. Re rapela mo leineng la gagwe. Amen.

3. Lefoko la Testamente e kgologolo le kwadilwe mo go Eks. 34:4-10;
Epistolo ka fa thulaganyong ya 2 e kwadilwe mo go Baefeso 4:22-32;
Efangele ka fa thulaganyong ya 3 e kwadilwe mo go Mareko 1:32-39.

4. A go ipolelwe tumelo ya bokeresete!

5. Sefela sa 176 - 159/166

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Mareko 2:1-12, e re: "Morago ga malatsi mangwe a boa a tsena mo Kaperenaume; mme ga utlwala, fa a le kwa lapeng. Jaanong ga phuthaga batho ba bantsi, ga ba ga tlhokafala manno tota le fa mojako, mme a ba bolelela Lefoko. Ga ba ga tla bangwe, ba tsisa mongwe yo o suleng mhama go ene, a rwelwe ke batho ba le bane. Ya re ba palelwa ke go mo isetsa kwa go ene ka ntlha ya bontsi, ba rutla thulelo, fa a leng teng; ya re ba sena go phunya, ba folosa bolao jo motho yo o suleng mhama o neng a letse mo go jona. Ya re Jesu a bona tumelo ya bone, a raya yo o suleng mhama a re: 'Ngwanaka, dibe tsa gago o di itshwaretswe.' Mme bangwe ba Baitse-dikwalo ba ne ba ntse teng, ba akanya mo dipelong tsa bone ba re: 'Yo, o buelang jaana? O a kgala! Ke mang yo o nang le thata go itshwarela dibe, fa e se Modimo o le osi?' Ya re ka Jesu

a lemoga ka bonako mo moweng wa gagwe gore ba akanya jalo mo teng ga bone, a ba raya a re: 'Lo akanyetsang jalo mo dipelong tsa lona? Mo go botlhofo ke gofe? A ke go raya yo o suleng mhama o re: 'Dibe tsa gago o di itshwaretswe;' gongwe go re: 'Tsoga o tsee bolao jwa gago, o tsamae?' Mme lo tla lemoga gore Morwa-Motho o na le thata mo lefatsheng go itshwarela dibe!' Jaanong a raya yo o suleng mhama a re: 'Ke go raya ke re: Tsoga o tsee bolao jwa gago, o boele kwa gae!' Mme a tsoga, a tsaya bolao jwa gagwe ka bonako, a tswa fa pele ga bone botlhe, mo botlhe ba bileng ba gakgamala, ba galaletsa Modimo ba re: 'Ga re ise re ke re bone se se ntseng jaana.'" Amen.

8. Thero: Barategi mo Moreneng wa rona Jesu Keresete, lefoko la thero ya kajeno le re ruta se segolo, e bong boitshwarelo jwa dibe tsa rona ka Jesu Keresete, Mopholosi wa baleofi, e le thuto e e re bulelang mojako wa legodimol Lefoko leo le re gopotsa gore Jesu o na le thata go re fa tsotlhe tse re di tlhokang mo botshelong jwa rona. Bogolo go moo o re fa se segolo bogolo thata, ke raya neo ya botshelo jo bo sa khutleng ka go tlosa se se re kgaoganyang le Modimo Rara wa rona yo o mo legodimong, e bong maleo a rona. Re bolelelwa jalo gore lo itse gore Morwa motho o na le thata mo lefatsheng go itshwarela dibe. O ne a fodisa yo o neng a sule mhama, a mmolelela, a re: "Ke go raya ke re: Tsoga o tsee bolao jwa gago, o boele kwa gae!" Jesu Keresete yo e leng Mong-wa-thata-yotlhe o na le thata go itshwarela maleo. Re itse le lefoko le le reng: "O nonofile go dira bogolo go feta tsotlhe tse re ka di kopang le tse re ka di gopolang ka fa thateng e e dirang mo go rona, a kgalalelo e nne ya gagwe mo phuthengong, le mo go Keresete Jesu go ya tshikatshikeng tsa bosakhutleng. Amen," Baef. 3:20. Ke nnete, Jesu Keresete o na le thata jaaka Rraagwe yo o mo legodimong go re fa bogolo go feta tsotlhe tse re ka di kopang le tse re ka di gopolang

Jesu o ne a ruta mo ntlong kwa Kaperenaume. Batho ba le bantsi ba ne ba phuthego teng, gone o ne a ruta ka thata ka go feta baruti ba molao. Morwa Modimo Jesu Keresete a ruta Efangele ya Modimo, a re: "Sebaka se weditse, puso ya Modimo e atametse. Tlhabologang lo dumele Efangele!" Batho ba le bantsi ba bonye gore motho yo ga a tshwane le ba bangwe, ba bonye motho yo o neng a ruta ka thata. Jesu Keresete o ne a ruta ka thata, a fodisa balwetsi. Go ruta Efangele ya Modimo le go fodisa balwetsi ga mo kopanya le ba bangwe, o ne a sa dire jaaka batho ba lefatshe leno, mme a dira e le Morwa Modimo. Mme batho ba ne ba sa bona, le e seng go lemoga boammaaruri joo, ba mo amogela jaaka motho yo e leng motho fela. Ba ne ba ntse ba botsa ka go "akanya mo dipelong tsa bone ba re: 'Yo, o buelang

jaana? O a kgala! Ke mang yo o nang le thata go itshwarela dibe, fa e se Modimo o le osi?" Mme bangwe ba ne ba lemogile gore Jesu ke mang. Ba dumela, ba bona ka matlho a tumelo, jaaka Johane a kwadile a re: "Le gale, botlhe ba ba neng ba mo tshola, a ba naya tshiamelo ya go nna bana ba Modimo, e bong ba ba dumelang mo leineng la gagwe."

A re lebeng sentle ba ba tlisitseng motho yole yo o neng a sule mhama. Lefoko le re: "Ga ba ga tla bangwe, ba tsisa mongwe yo o suleng mhama go ene, a rwelwe ke batho ba le bane." Ba dirang? Ba rata go mo isa mo go Jesu Keresete, mme ba sa kgona ngenxa ya bontsi jwa batho. Ba sa kgona go atamela ka tsela e e jwaelegileng, mme ba sa tlogela go leka go fitlha mo go Jesu. Ba fenyatsa tse di ba thibetseng gore ba kgone go dirafatsa tse ba di eleditseng, tse ba di ikaeletseng. Ga ba a boela gae ka go fapogela go gongwe, ba sa re: Re tla leka ka letsatsi le lengwe. Nyaya, ba ne ba tlamalela mo go Jesu Keresete, banna ba le bane bao ke sekao se sentle mo go rona rolthe ba re leng badumedi. Ke rata go ba tshwantsha le bagolo le basupi ba bana ba ba tlisetsang bana mo kolobetsong gore ba tshwane le banna bale ba ba tliseditseng yo o suleng mhama mo go Jesu. Bagolo le basupi ba kopela ngwana kolobetso, ba eletsatsa, ba batla thuso mo Mopholosing wa batho, ba kopela yo mongwe thuso. Ke rata go tshwantsha batho botlhe ba ba rapelelang ba bangwe, ba tshwana le ba le bane bale ba kopela ba ga gabo, gongwe ba bangwe gore ba gorosiwe mo pholosong, mo go Jesu Keresete, ba dumele mo go ene, fa ba ise ba kolobediwe, ba kolobediwe. Botlhe ba ba thusang bana, ditsala, ba losika, badiri mmogo le bone gongwe ba bangwe ba ba iseng ba itshwarelwe gore ba gorosiwe mo go Jesu, ba dumele mo go ene.. Ke kopa go tshwantsha batho ba ba tsosang ditsala tsa bone ka Sontaga phakela gore ba tlhape, ba ikapese gore ba ye le bone mo kerekeng . Barategi, mosadi yo mogolo yo o felegetsang dikokomane tsa gagwe go ya mo tirelong ka Sontaga phakela, A a se ka a gopola gore o a ba tshwenya. O tshwana le banna ba le bane bale ba ba iseditse yo o neng a sule mhama mo go Keresete. Yo o romelang bana ba gagwe mo sonto-sekolo le mo sekolong sa tlhomamiso o dira tiro ya banna bale ba le bane. A re se ka ra tshwenyega, le e seng go lapa ka ntlha ya tse di thibang, a le rona re leke go rutla thulelo, fa e leng teng; ya re ba sena go phunya ditlhomiso, ba folosa bolao jo motho yo o suleng mhama a neng a letse mo go jona. Re leke go rutla dithulelo tse di re kgaoganyang gongwe batho ba bangwe le Jesu, re leke ka diteko tse dintsi, le ka ditsela tse dintsi go tlisetsa batho ba ga etsho, le ba bangwe mo go Jesu Keresete. A re se ka ra fapoga mo tseleng! Re se lape mo tseleng, mme re senke ditsela go fenyatsa tse di thibelang batho mo tseleng ya go ya mo go Jesu Keresete.

Lefoko la thero ya kajeno, le re: "Jesu o ne a bona tumelo ya bone." A bona tumelo ya bone. Ke gore o bona tumelo ya bagolo ba ba itshwenyegelang bana ba bone, ba ba ba isetsang mo go Jesu Keresete, o bona tumelo ya basadi ba bagolo ba rona ba ba re iseditseng mo kolobetsong. O bona tumelo ya motho yo o rapelelang ba bangwe. O a bona, fa re rwala go isa batho ba ba sa yeng ka bobone mo go ene. A re se ka ra nyatsa tiro e re ka e dirang gore ba bangwe ba goroge mo go Jesu. A re sa ka ra tlogela tiro eo go isetsa ba ba iseng ba itse Jesu mo go ene. A re se ka ra tshwenyega go ba ise mo go ene gore ba pholosiwe, ba amogele thuso, ba amogele boitshwarelo jwa dibe tsa bone.

A re lemogeng gore Jesu o ne a simolola go mo itshwarela maleo a gagwe. Ke sona sesupo se segolo sa Efangele. Jesu o tlile mo lefatsheng go pholosa baleofi mo maleong a bona. Ke nnete, e bile o na le thata go fodisa motho yo o lwalang, mme se se tlhokegang bogolo ke boitshwarelo jwa maleo a rona. Go fodisa motho yo o lwalang, go mo thusa mo botshelong jwa go tshela mo lefatsheng leno. Go itshwarela motho maleo a gagwe go mo abela botshelo jo go sa khutleng, ka fa kategisima ya kereke ya Lutere e ipolelang ka teng, e re; "Kwa go leng boitshwarelo jwa diebe teng, go na le botshelo le pholoso e e sa khutleng." Barategi mo Moreneng, Jesu Keresete o mogolo thata go gaisa dingaka tsotlhe, Jesu ke Ngaka ya dingaka tsotlhe. Mo go ene ga go akanngwe mo go kalo ka ga kalefo ya mmele, mme go solofediwa pholoso le kgololo mo maleong, mo losong, le mo thateng ya ga Satane, ka e le Mopholosi wa rona. Ga a re thuse fela mo botshelong jo re nang najo ka kwano, mme o a re thusa, le go re pholosa gore re bone botshelo jo bo sa khutleng mo pusong ya gagwe, a re: "Ngwanaka, dibe tsa gago o di itshwaretswe! Ke go mmulela mojako wa legodimo."

A re tlhotlhomise bogolo jwa tirelo ya boipobolo. Le mo go yona Jesu Keresete o bua mafoko ao ka molomo wa moruti gore re a utlwe mo ponatshegong, rona ba re tshelang kajeno, re ikwatlhaetse maleo a rona. Le rona o re bulela mojako wa legodimo, fa re itshwarelwa maleo ka go bewa diatla mo leineng la Modimo Rara le Morwa le Mowa o o Boitshepo. Kana "boipobolo bo na le dikarolo di le pedi: Ya ntlha ke go ipobola dibe, ya bobedi ke go amogela boitshwarelo ka molomo wa moruti jaaka mo Modimong ka osi, motho a sa belaele sepe, mme a dumela ka tlhomamo gore dibe tsa gagwe o di itshwaretswe fa pele ga Modimo." A re se ka re belaela ka tsholofetso e ya go itshwarelwa dibe ka ntlha ya lorato lwa Modimo o e leng Rara wa rona mo legodimong, o rata go re itshwarela dibe tsa rona mo leineng la ga Jesu Keresete Mopholosi wa rona, Mopholosi wa baleofi botlhe.

A re akaretseng tse tsotlhe tseo ka dipolelo tse tharo, re re: Jesu Keresete o a bona, o amogela tiro ya badumedi, fa ga tlisetsa batho ba ba iseng ba mo itse go tla mo go ene, mo kolobetsong, mo boipobolong, mo selalelong, gongwe mo thapelong. Jesu ga a nyatse tiro eo. Jesu Keresete o rata go thusa, bogolo ka go itshwarela dibe, le go ba bulela mojako wa legodimo ba ba tlisediwanng mo go ene. Jesu Keresete o a thusa, le go dira bogolo go feta tsotlhe tse re ka di kopang le tse re ka di gopolang ka fa thateng ya gagwe. A re lebogeng Mopholosi wa rona ka tsotlhe tse re nang natso, le ka tsotlhe tse re leng tsona. Amen.

9. Thapelo: "Baka MORENA, Mowa wa me, le tsotlhe tse di mo teng ga me, bakang leina la gagwe le le boitshepo! Baka MORENA, mowa wa me; se le bale sepe sa ditiro tse di molemo tsa gagwe! O itshwarela maleo a gago otlhe, o fodisa makoa a gago otlhe. O boloka botshelo jwa gago mo tshenyegong o go rwesa bopelotlhomogi le mautlwelo-botlhoko mo tlhogong, O go kgorisa tse di molemo gore o busediwe bokaung jaaka ntsu." Amen.

Thapelo ya Morena: Rara wa rona yo o mo legodimong ...

10. Sefela sa 167 - 149/152

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke P. C. Weber, ka ngwaga wa 2015

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.